

AKASHVANI AIZAWL
REGIONAL NEWS BULLETIN
HEADLINES (EVENING)

Date – 19/08/2025

Time - 18:30 -18:40Hrs

- Sairang leh Kawnpui inkar kawng a chhiat leh deuh tak avanga nimin atang khan ni 3 chhung zing dár 7 atanga tlai dár 6 thleng lirthei tlan chawlhthir leh a ni .
- Vairengte leh Bairabi-a ILP pek chhuahnaah zanin atangin MZP sub headquarters chuan an theih ang angin duty an tawiawm ve dawn.
- LADC a Chairman Pu T.Zakunga leh Dy Chairman C Biakthansangi te vawiin khan an bang a, heivang hian LADC a CEM in thlawptu a neih dan fiah theih a nilo.
- Eptu party hrang hrang intelkhawmna, INDIA-in Vice President thlanna neih tura an candidate atan Supreme Court Judge hlui, B. Sudershan Reddy-a an ruat.

<><><>

NH

Mizoram chak lakluhna kawngpui pawimawh Sairang leh Kawnpui inkar kawng a chhiat leh deuh tak avanga nimin atang khan ni 3 chhung zing dár 7 atanga tlai dár 6 thleng lirthei tlan chawlhthir leh a ni a, hei vang hian phai lam atanga bungraw phur engemawzat kawng lakah an tangkhang leh mek.

He kawng siam tur chungchanga sorkarin Single point of contact atana a ruat, Pu TBC Lalvenchhunga MLA chuan nimin khan thuchhuah siamin, kawng a chhiat leh deuh tawh avangin nimin atangin ni 3 chhung zing dár 7 atanga tlai dár 6 thleng Sairang leh Kawnpui inkar lirthei tlan chawlhthir leh tur a nih thu leh zan lamah erawh an chhuah reng tur thu a sawi a ni.

Hemi chungchanga Aksahvani Aizawl zawhna chhangin, Lirtheia Eizawng Pawl Hrang Hrang hrulaitu zinga mi, MTDA President Pu H.Laldingliana chuan tlan chawlh puan a nih thu an dawng ve lo tih sawiin, lirthei te chu an intlar tawp a, a chhuah hunah an chhuak ve mai thin a ti a, kawng a tluan that a, chhum lo chat lova lirthei an tlan that chuan ni 1-ah lirthei sang 1 chuang an tlan thin laiin tunhnaiah kawng a chhiat leh tak avangin niminpih atanga lirthei ruak chhuah tawh te pawh an ding hnem leh tawh hle a ti a, nimin zing kara kal tawh lirthei te pawh Buichali thlen hmaah tangin an la che sawn lo a ti a, Sairang peng Kawnpui lam atanga pelh thlak bakah Kawnpui atanga Mega Food Park pelh pheih te chu kawng chhe zual lai a ni a ti a, zankhata lirthei tlan ten kawng chu an rap khuar nghal duk zel avangin kawng a khuar leh tawh hle niin a sawi bawk.

Sorkarin lirthei che vel a chhinchhiah danin, nizan khan Kawnpui atanga Aizawl pan bungraw phur lirthei 402 chhuah an ni a, Mualkhang/Khamrang atanga Kolasib/Assam lam panin lirthei engmah chhuah a ni lo thung a, Sairang pengah lirthei 152 leh Mualkhangah lirthei 374, avaiin lirthei 526 a tangkhang mek a ni.

<><><>

BJP MIZORAM

BJP Mizoram chuan kuthnathawktu ten an buh bal te insurance an neih ve thuai a tul tawh hle a ti.

Vawiin khan Agriculture Director chu a Pisa ah hmuin, Agriculture Insurance Company te pawh an biak tawh thu leh Mizoram a Kuthnathawktute thlai thar insurance an neih theih nana Sorkar nen hnathawh an inpeih thu an hrilh an ti a ni.

Hemi chungchangah hian thuchhuah siamin, BJP Mizoram chuan tunhnai ah Kuthnathawktu nuaih 30 hnenah Union Agriculture Minister Shivraj Singh Chuaahana'n PM Crop Insurance hnuai ah cheng Vaibelchhe 3200 a release a. Kum 2016-a Central a BJP in sorkar na a chelh khan Kuthnathawktu te hmakhua thlir chungin PMFBY /Prime Minister Crop Insurance Scheme duang chhuakin kuthnathawktu vaibelchhe 78 vel zet in an buh bal te insurance nei turin an ziaak lut a. Vaibelchhe Nuaih 1.83 lai insurance ti tu te hnen ah thlai lu man pek chhuah tawh a ni, an ti.

BJP Mizoram Hruaitu te chuan Central Sorkar in Kuthnathawktu te puihna a pek thin PM-KISSAN a inziaak lut tawh tanpuina la lutlo chungchang leh in ziaak lut thar duh te chungchang an sawipui nghal a, Agriculture Director hian BJP Hruaitu te thu thlen chu Kuthnathawktu te hmakhua ngai taka ti an nih na ah lawmthu sawiin, District Agriculture Office leh Block Agriculture Office te chu Kuthnathawktu te harsatna chinfelpui tur leh an mahni pui tura an awm reng thu a sawi a bawk a ni.

Tunhnaia India leh America te insumdawn tawna ah America in India atanga thil thawn chhuah te chhiah sang tak lak a tum a. Hemi denchhen hian America Thlai thar te India a thawn lut turin na takin USA President chuan a nawr a. Sorkar laipui erawh chuan a ram chhunga Kuthnathawktu te tawrh theihna tura eng hmalakna mah an neihloh tur thu in a chhang a. BJP Mizoram chuan hetiang taka Kuthnathawktute hmakhua ngaia a taka ngaihsak tu PM Narendra Modi kaihhruai sorkar a nei hi a chhuang takzet a ni, a ti.

<><><>

MZP

MZP President Lalthianghlina chuan nizana Hnam dang Mizoram luh tum te'n Mizoram Vairengte ILP Check Post-ah buaina an siam an duh loh avangin zanin atangin Vairengte leh Bairabi-a ILP pek chhuahnaah MZP sub headquarters chuan an theih ang angin an tawiawm ve dawn a ti.

Hemi chungchanga Akashvani Aizawl zawhna chhangin MZP President Lalthianghlina chuan tun August thla chhungin mi 2,573 hnenah ILP pek chhuah niin, nimin bikah mi 544 hnenah pek a ni a, August thla chhunga ILP pek chhuah hi chawhrualin nitin mi 140 bawr vel zel a nih lai a, nimina mi 544 zet an lo lut chu ngaihthat thlak loh an tih thu sawiin, an zingah hian CAPF sipai lakluh chhuanlama admit card neite awm mah se, an ngaih an ti tha lo a ti .

MZP President chuan tunhnaiah Nagaland-ah mini truck 100 chuanga mihring khat vek chu Nagaland Police leh Nagaland Student Federation ten an nawr kir tawh a, chutiang a nih avang chuan Mizoramah pawh hmalak a tul takzet a ti a, vawiin khan Home Minister Pu K. Sapdanga chu a office-ah hmu nghalin, Assam-in dan lova an rama awmte an hnawhchhuah mek hi Mizoramin a tawrh theih avangin ramriah Sipai leh Police tam zawk duty dah tur leh Assam atanga lo lut turte chu uluk taka an document-te check turin an ngen tih a sawi a, Mizorama hnamdang awmte pawh Dan lova Bangladesh atanga lo lut an nih leh nih loh tih a rang thei ang bera dap chhuak vek tura an ngen thu a sawi.

Vairengte leh Bairabi-a ILP pek chhuahnaah MZP sub headquarters chuan an theih ang angin an tawiawm ve dawn a, Aizawl chhungah pawh a theih ang angin ILP te an endik ve dawn a, a tul angin hma an la zui zel dawn tih a sawi a ni .

<><><>

WORLD PHOTOGRAPHY DAY

World Photography Day pualin vawiin khan Mizorama thlalak lama eizawng leh a tui mite awmna pawl hrang hrang- Mizoram School of Photography, Photography Club of Mizoram leh Mizo Photographers’ Society (MPS) te chuan Archives Hall, Babutlang leh Millenium Centre (Atrium)-ah te thlalak phochhuahna, Photo Art Exhibition leh inelna an buatsaih.

Mizoram School of Photography leh Photography Club of Mizoram ten World Photography Day kum 186-na puala Archives Hall, Babutlanga Photo Art Exhibition & Competition vawi 9-na an buatsaih chu Aizawl South 3 South bialtu MLA Pi Baryl Vanneihsang chuan hawngin, Mizoram School Of Photography te’n thlala thiam te chu an tuina zawng zirtir piah lamah eizawna tlaka an chher chhuak thin chu lawmawm a tih thu sawiin, thlalak chuan thawnthu tam tak a ken zel avangin hnam tan rohlu a nih thu a sawi a ni.

He Photo Exhibition hian ni 5 chhung awh tur a ni. Vawiin vek khan Mizo Photographers’ Society (MPS) chuan ni 2 awh tur, Millenium Centre (Atrium) ah an member mi 39 te kutchhuak thlalak 108 phochhuahna, Photo Exhibition an buatsaih chu Information & Public Relations Director Pu C. Lalnunkima’n a hawng a ni.

He hunah hian MPS ten Aizawl khawpui chhunga college zirlaite tan Photo Competition an buatsaiha ti tha ber an thlanchhuah te hnenah lawmman sem a ni a, MPS General Secretary H.Lalchhanhima chuan Photo Exhibition an buatsaih chu an rin aiin mipuiten an hlut thu sawiin, thlalak pho chhuah zinga entuten tha an tih ber vote hmanga thlan theihna, viewer choice an siam a, exhibiton chu naktuk tlai dar 5 thleng hawn a ni dawn a, mipuite chu he Photo Exhibition hi8 chhim ve theuh turin a sawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LADC

Lai Autonomous District Council a Chairman Pu T.Zakunga leh Deputy Chairman C Biakthansangi te chuan vawiin khan banna Governor hnenah an thehlut a, heivang hian LADC a CEM in thlawptu aneih dan fiah theih a nilo.

Nimina Chief Executive Member atan lakluhtak, United Democratic Alliance hruaitu Pu N.Zangura chuan thlawptu a neihdan fiahturin vawiin chhun dar 12 a tan turin LADC Chairman Pu T.Zakunga chuan nimin tlailam khan LADC Emergency Session a kova, Session tan hma hian ZPM Sorkar tlu taa, Chairman leh Deputy Chairman ten banna an thehluh vangin Session kaihhruaitur an awmlo a ni.

Pu T.Zakunga hi kumin March 26 khan LADC Chairman atan thlan a ni a, C.Biakthansangi hi April 22 khan Deputy Chairman atan thlan a ni.

LADC a UDA Sorkar piang chho mek ah, Chairman leh Deputy Chairman te an ban vang hian UDA lam chuan Governor hnenah Protem Chairman ruatsak turin ngen thuai an tum a, Protem Chairman kaihhruaina hnuai ah Chairman thar thlanna neih a la ni ang.

<><><>

INDIA BLOC’S CANDIDATE FOR VICE PRESIDENT

Eptu party hrang hrang telna, INDIA chuan Vice President thlanna neih tura an candidate atan Supreme Court Judge hlui, B. Sudershan Reddy-a an ruat. He thu hi Cong President, Mallik Arjun Kharge-a vawiina New Delhi-a thuthar lakhawmtute a kawmnaah puangin Vice President post chuh tur hian eptu party zawng zawngte chu an inlungual a ni, a ti a, Pu Reddy-a hian tun thla ni 21-ah chuh tura hming a thehluh tur thu a sawi bawk.

Hetih lai hian Prime Minister Narendra Modi-a chuan eptu party-te tiamin political party zawng zawngte chu Vice President atana NDA candidate, CP Radhakrishnan-a thlawp turin a ngen a, tukina NDA Parliamentary Party thutkhawm neihah Pu Modi-a hian NDA MP-te hnenah Pu Radhakrishnan-a hi a inhmelhriattir a ni.

Thutkhawm zawha Parliamentary Affairs Minister, Kiren Rijiju-a’n thuthar lakhawmtute a hrilh danin, Prime Minister chuan Vice President atan Pu Radhakrishnan-a lungual taka thlang turin political party leh MP zawng zawng a ngen a ni, a ti.

<><><>